

**Garalurrek**  
ikastaro eskaintza  
berria egin du



Sakanerria >> 5

**Sakanako Bardoak** lanera.  
**Nafarroako taldekako bertso**  
ekimeneko **saioa gaur, 22:00etan,**  
**Arbizuko Argibidea** elkartean



Kultura >> 15

# Sakanan gehiago birziklatzen ari gara

Hiru hondakin bilketa sistema erabilita  
pasa den urte akaberan Sakanan gaikako  
bilketa %45,49ra igo zen

Legediak %50a markatzen du. Irurtzunen  
eta Altsasun gaia landuz gero datua  
hobetu egin daiteke

>> 9

**Mank-ek D**  
ereduaren  
aldeko  
gonbitea  
luzatu du

D ereduari matrikula-  
tzera animatu ditu  
gurasoak

>> 7

**Kintoak**  
Burundan  
eta ihoteak  
Irañetan

>> 6



Mendi ertaineko kirol-technikaria, zikloko ikasleak eta irakaslea LHko sarreran.

# Ikasketa berriak Lanbide Heziketan

>> 5

**GUaiXE**

Sakanaz sarean

TOKIKOM

Egin zaitez  
**komunitateko Kide**

**UHARTEKO HAUR ESKOLA KUDEATZEKO DEIALDIA:** Uharteko Udalak heldu den ikasturterako Pausoka zentroko haur hezkuntzako eta garbiketa eman nahi ditu.

Kontratua gehienez lau urtera luzatu daiteke. Eskaintzak hilaren 18ra arte aurkeztu daitezke udaletxean.

# sakanerria >>

## SAKANA

# Ikasketa berria mustu du Lanbide Heziketak

Ostegunean hasi ziren mendi ertaineko kirol-teknikaria zikloko ikasketak

Astelehenero eta asteartero 21 ikasleekin handitzen da Sakana Lanbide Heziketako Ikastetxe Integratu Publikoko ikasleria. Mendi ertaineko kirol-teknikaria zikloko ikasketak egiten hasi berri diren ikasleak dira horiek. Ostegunean kurtsoko aurkezpenean bildu ziren estreinakoz eta ostiralean aurreneko klase eguna izan zuten.

Maila ertaineko prestakuntza ziklo horretan interesa 56 pertsonen azaldu zuten. Zerrendaren lehen orrazketaren ondoren, hautagaiak sarrera proba gainditu behar izan zuten: 10 kiloko motxilarekin Beriainen gora eta behera eta Aralarra igo behar izan zuten, baita beste hiru proba gainditzearekin batera. 24 izan dira hautatuak. Lana opatu dutelako edo bestelako arrazoiengatik hiru

hautagai ez dira hasi.

Amaia Rezusta irakasleak esan digunez, oraingo elkar ezagutzen ari dira ikasleak. Azaldu digunez, haietako batzuk aspaldi ez zirela klase batean sartzen eta "nabari da, baina gogotsu daude". Ikasle-eta bi Uharteko Itziar Retegi eta Etxarrin bizi den Jon Goñi dira. Retegik mendia gustatzen zaiolako eman du izena. Goñik, berriz, Elizondon, mendia eta zaldien inguruko beste ziklo bat egina du eta haren jarraipena egin nahi izan du. Biek ere helburu bera dute, titulua ateratzea eta arlo horretan lan egin ahal izatea. Ikasketek galde-tuta aitortu digutenez, "pixka bat kostatzen da baina hartuko diogu". Haien ikaskide batzuk Elizondo edo Iruñekoak direla jakinda, ikasketak Sakanan bertan egitea gauza handia dela esan digute.

### Zikloaz

Ikasketa berriek aurreneko kurtsuan 420 orduko iraupena dute. Aste Santua bitartean komuneko prestakuntza eta osagarria jaso-



Gogoz ekin diote ikasleek eta irakasleek ziklo berriari.

ko dute. Horretarako irakasle berri bat etorri da ikastetxera. Oporraldiaren ondoren, maiatzean, mendira aterako dira, klasean ikasitakoa mendian praktikan jartzeko. Horretarako LH institutura 3. mailako kirol teknikari titulua duten espezialistak etorriko dira, eta haiekin ibilbideak eta bestelakoak egingen dituzte. Espezialista bakoitzak 8 ikasle izanen ditu bere ardurapean. Saio horien ondoren, garagarriean, ikasleek

enpresetan praktikak egiteko prest izanen dira.

Ikasketak despeditzeko heldu den urtean bigarren kurtsua egin beharko dute (555 ordu, guztira 975). Behin gradu ertaineko mendi ertaineko kirol-teknikaria zikloko titulua eskutan dutela ikasleek ikastetxe, klub, federazio edota enpresetan lan egiteko aukera izanen dute. Ikasketetan sakondu nahi duenak goi mailako ikasketak egin ditzake.

### Sakana LH IIPko eskaintza

Horretaz aparte, honako ikasketak egin daitezke: motorren mekaniko laguntzailea (DBH gaindituz duten ikasleei zuzendutako programa); mantenu elektromekanikoa (gradu ertaina); sodadura eta galdaragintza (gradu ertaina) eta mekatronika industrialia (goi gradua).



## Bertako historia turismorako baliabide bihurtuta

**Cederna-Garalurrek Nafarroako estatuari buruzko ikastaroa antolatu du langabetu eta turismo-eta zerbitzu-establezimenduetakoei zuzenduta**

Nafarroaren historia Sakanan turismo baliabidea izan zitekeela ohartu ziren hainbat eragile eta kezka horri erantzunez Cederna-Garalurrek ikastaroa antolatu du.

Prestakuntza saio hori arlo horretan interesa izan dezaketen langabetuei eta turismo- eta zerbitzu-establezimenduetako langileei zuzenduta dago. Ikastaroan Nafarroako estatuaren historiaren berri

emanen da VIII. mendetik XVI. mendera arte eta aparteko trataera izanen du Sakanan garai hartan bizi izandakoak. Ikastaroa heldu den asteko asteazkenean hasiko da eta 9 saio izanen dira (otsailak 12, 19, 26; martxoak 5, 12, 19, 26 eta apirilak 2, eta 9). Saioak Garalurrek Arbizun duen egoitzan izanen dira (19:00etatik 21:00etara).

### Gehiago

Garalurrek aurtengo 20 ikastaroz osatutako prestakuntza programa eskaini dio Nafarroako Men-

### Argibideak:

sakana.admon@cederna.es edo 948 567 010. Sakanaz kanpoko ikastaroen berri ere.

dialdeari. Prestakuntza-eskaintza berri horren xedea da herritarrak gaitzea haien lanbide-profilak landa-eremuko garapen jasagarri-rako eskakizunetara egokitzeko, eta, horrela, lehiakortasuna areagotzeko eta enplegu-eta lan-aukerak hobetzeko.

Sakanan beste bi ikastaro ere



Etxeberriko Aixita gazteluan mugarrria jarri zutenekoa.

aurreikusitu ditu Garalurrek. Bate-tik, nire zaletasuna nire lanpostu

bihurtu ikastaroa. Bestetik, zuzenean saltzeko estrategiak ikastaroa.

### Uharte Arakil

## Pausokako haur eskolako zerbitzua kudeatzeko deialdia

Uharte Arakilgo Udalak haur hezkuntzako lehen zikloko Pausoka zentroko haur hezkuntza eta garbiketa zerbitzuak emateko deialdia egin du. Heldu den ikasturterako deialdia egin du, baina kontratua gehienez ere lau urtera luzatu daiteke.

Udalaren deialdian jaso denez, Pausoka 7 orduz egon beharko du zabalik heldu den ikasturtean. Hura kudeatzeko beharrezko jotzen ditu lanaldi osoan ariko den zuzendari eta hezitzaile bana eta egunero 1,75 ordu ariko den garbitzaile bat. Guz-



Umeak gelan.

tira 63.550,21 euroko aurrekontua aurreikusitu du udalak ikasturte baterako (254.200,84 euro luzapenak betetzen badira). Eskaintzak hilaren 18ra arte aurkeztu daitezke Uharteko udaletxean.

### Bakaiku

## Gaztainondoen etorkizunaz mahainguruan

**Gaur, 18:30ean, Bakaikuko udaletxean**

Garai batean aparteko garrantzia izan zuen gaztainak bakaikuarren bizitzan. Gaztaina mozte eguna ospatu izan zen pasa den mendeko 60ko hamarkadara arte. Familia bakoitzak hainbat gaztainondo zituen. Egun bat zehazten zuten Bakaikun gaztainak hartzeko.

Kultura Batzordeak azken urteetan Gaztaina biltze eguna berreskuratu du. Horieta parte hartu duten bakaikuarrek bertatik bertara ikusi dute gaztainondoak gaitxo daudela. Eta hainbat galdera



Bakaikuarrek gaztainak biltzen.

sortu ziren: zergatik gaixotu ziren? Sendatzerik dute? Berriak landatu edo zaharrak kimatu? Nola eta non egin?

Galdera horiei guztiei erantzuna opatu nahi dute Kultura Batzordeko kideek eta, horrela, "basoan nola esku hartu zehazten hasi". Baina horretarako "herri jakintza aberastea garrantzitsua" dela iriztita gaurko mahainguruan bakaikuarrek parte hartzera gonbidatu dituzte. Gaztainondoen gaitzen nondik norakoak ezagutzera emateko Berako baso ingeniari bat etorriko da ere bai.